



UKA 2017/67  
18/10-2017  
Nivi Olsen

**Inatsisartut aalajangiiffigisassaattut siunnersuut Naalakkersuisut peqquneqassasut, aalisarnerup iluani tunitsivinni tunisat tamaasa oqimaassutsinut akigititat ingerlaavartumik saqqummiuneqartalernissaat anguniarlugu internikkut portalimut pilersitsinissamik nalunaarusiamik 2018 ingerlarnerani agguaassissasut. Nalunaarusiami nalilersuinerit, suliassat pilersitsinissamut tunngasut, naleqqussaajuarnissamullu aningaasartuutissat ilanngunneqassapput, portali qanoq aqqissuunneqarsinnaanersoq – kiisalu inuussutissarsiummut tunngatillugu aningaasarsiornermut unammilleqatigiinnermullu qanoq kinguneqarsinnaanera ilaatinneqassallutik.**

(Inatsisartunut ilaasortaq Henrik Fleischer, Partii Naleraq)

(Siullermeerneqarnera)

Demokraatini tunngavisumik isumaqarpugut, unammilleqatigiinneruneq paasiuminarsaanerlu sutigut tamatigut inuiaqatigiinni pingaaruteqartut. Aamma taamaappoq aalisarnerup iluani, tassanimi qularutiginnilarput unammilleqatigiinnerusoqartillugu tunisinermi akit pitsaanagerusartut. Tamanna assersuutigalugu takoreerparput Ilulissani, Royal Greenlandip Halibutillu unammillerfiani aalisakkat tunisat akii qaffasinnerummata.

Siunnersuummi uani Partii Nalerameersumi kissaatigineqarpoq qarasaasiami portalimik, aalisarnerup iluani tusinermi akinik ingerlaavartumik katersivissamik akillu nikerarnerinik nalunaarsuivissamik pilersitsinissaq pillugu nalunaarusiortoqassasoq.

Demokraatini kissaatigineruarput inuussutissarsiortut inuussutissarsiortullu kattuffiinik suleqateqarnissarput aalajangiiffigisassat inuiaqatigiinnut aningaasartuutaasussat aalajangiiffigitinnagit. Matumani nassuiaat ujartorneqartoq milliuunip affaanik akeqartussaavoq, nalunaarusiortoqassappallu naalakkersuisoqarfil ulappuffioreeqisoq immikkut suliakkerneqartariaqartussaavoq.

Demokraatini isumaqarpugut nalunaarusiortitsinissaq nukinnik atuilussinnarnerussasoq nalullugu suliaq atornerqarumaarnersoq. Paarlattuanik Naalakkersuisut isumaqatigaagut oqarmata pitsaanerussasoq inuussutissarsiummi illuatungeriit saaffigineqartuuppata oqaloqatiserallugit siunertaralugu kalaallit nunaanni aalisarnerup iluani akit paasiuminarnerusut pissarsiarisalerlallugit aqqiissutissarsioqatigiinnissaq.

Inatsisartut Aalisarnermut Piniarnermullu Ataatsimiititaliaa oqaloqataaqquneqarsinnaavoq periutsip nassaarineqarumaartussap Inatsisartuni tapersorsorneqarsinnaanissaa qularnaarumallugu, sapinngisamik aalisarnerup iluani paasiuminarsaaneq unammilleqatigiinnerunissarlu siuarsarnerujumallugit.

Taamatut oqaaseqarluta inassutigaarput siunnersuut itigartinneqassasoq.